

# Mater Misericordiae cun Huonder

Il cau diocesan per l'emprema gada sco celebrant e predicatur a Mustér

■ (anr/gc) Ei ha era gia giu dapli glied ch'uonn alla gronda fiasta da Mater Misericordiae – che croda mintgamai sin la dumengia suenter Nossadonna d'uost – en claustera a Mustér. Vid l'aura ha ei mintgacass buca muncau, essend quella seprentada uonn da sia pli biala vart – sco la fiasta sezza insumma. Igl ei tradiziun ch'igl uestg diocesan da Cuera ei celebrant e predicatur festiv da Mater Misericordiae. Uonn ei quei stau per l'emprema ga uestg *Vitus Huonder*, vischin d'honor da Mustér ed anteriur dalla scola claustrala (avon in onn eis el staus impediud, essend ch'el veva giu dau plaid gia pli baul da visitar quella dumengia ina cuminonza spirituala a Rheinau (ZH). Avat *Daniel Schönbächler* ha beneventau ed engraziu a tut quels che han cooperau – e secapescha era ils fideivels. Ins vegli dar per quella fiasta era in segn da solidaritad cristiana universala cun prender si la collecta d'oront messa pils Centros Sociales Cristo Obrero en Peru, l'ovra missiunara, vegnida instradada 1967 da sur Pius Camenisch. Quella vegn continuada, dapi sia mort 1992, da *Clotilda Demund*, che s'engascha caritativamein, socialmein e religiosamein cun quellas instituziuns en favur da scolar e formar affons e giuvenils.

## Messa nova e profund priedi

Cun quei ch'il chor claustral ei da quei temps aunc en vacanzas, eisi dapi onns usitau ch'il Chor-baselgia s. Gions da Mustér conta messa per Mater Misericordiae. Uonn ei quei succediu cun ina



Entrada dil magisteri en baselgia.

FOTOS G. CAPALU



Plaid final d'uestg Vitus Huonder avon claustera.

premiera per el sin claustera. El ha cantau leu «la messa cul psalm svizzer» da pader Alberik Zwysig, che *Hubert Spörri* ha cumponiu ord fragments da Benno Ammann e Johann Baptist Hilber, che sebasan sin il psalm svizzer e che vegn cantada dapi 2004 dapertut en Svizra – per grond plascher dil pievel (premaudiziun ha la messa numnada giu a Mustér/s. Gions da Pastgas 2009 en preschientscha dil cumponist).

En siu cuort e bi priedi, ch'uestg Vitus Huonder ha tenui ton per romontsch sco per tudestg, ei la misericordia vegnida caracterisada sco ina qualitat divina. Ella seigi quella carezia che Dieus demuossi per il carstgaun en miseria. Tala detti al human ina nova natira – la grazia. Dieus vegni encunter per ch'il carstgaun sedistachi dil mal e semetti sin via viers el. Quella misericordia divina vegni era intermediada cun e tras Maria, che seigi daventada sut

la crusch nosa mumma cun recepir leu la misericordia da Diu ch'ella detti vivonavon, per che nus contonschien quella, tras recuorer tier ella.

## Clars plaids digl uestg

Suenter il survetsch divin pontifical semetta la processiun en moviment, cantond la canzun dalla mumma dalla misericordia. Denteren dat ei ina fermada per la benedicziun. Uestg Vitus Huonder drezza per la fin avon claustera aunc zacons plaids, che sebasan sin la davosa enciclica da *Papa Benedetg XVI*. Quella hagi survegniu gronda muntada en vesta alla greva crisa da finanzas e dall'economia, mettennd biars en pigiras e miseria. Economia drovi in'etica favoreivla al carstgaun. Quei hagi muncau. Tradiziun e cardientscha cristiana sappien esser en tals muments sustegn e directiva. Cun las salvias dall'Uniu da giuventetgna e dalla Societat da musica agl uestg ed agl avat eisi iu a fin.